

Perjuangkan Hidup Melayu

Oleh ZIN MAHMUD
(WARTAWAN UTUSAN)

HARI ini, 61 tahun dahulu UMNO ditubuhkan dengan gabungan persatuan-persatuan Melayu di seluruh Tanah Melayu di bawah pimpinan Datuk Onn untuk menjadi platform bagi gerakan menentang Malayan Union.

Orang Melayu nyaris-nyaris kehilangan tanah airnya kerana penjajah Britain yang baru kembali setelah dinyah oleh Jepun mahu menghapuskan kedaulatan raja-raja Melayu.

Mereka mahu menukar kedudukan Negeri-Negeri Melayu Bersekutu (FMS) dan Negeri-Negeri Melayu Tidak Bersekutu (UFMS) yang bersifat naungan kepada tanah jajahan bernama Malayan Union dicantumkan bersama Melaka, Pulau Pinang, Seberang Perai dan Dinding.

Kalau tidak kerana Datuk Onn, orang Melayu ketika itu tidak sedar akan hampir kehilangan negeri mereka. Sudah berpuluh tahun sejak Britain masuk ke Tanah Melayu selepas Perjanjian Pangkor dirasakan bahawa negeri mereka sudah dijajah dan orang Melayu tidak mampu menghalang penguasaan kuasa Barat itu.

Penentangan orang Melayu terhadap penjajah Britain oleh pejuang-pejuang seperti Datuk Naning di Melaka, Datuk Maharajalela di Perak, Datuk Bahaman di Pahang, Tok Janggut di Kelantan dan Abdul Rahman Limbong di Terengganu menemui kegagalan.

Tetapi sebenarnya sembilan negeri-negeri Melayu di Tanah Melayu belum benar-benar menjadi tanah jajahan. Mereka hanya menjadi wilayah naungan dengan kedaulatan raja-raja masih utuh. Yang sudah menjadi tanah jajahan Britain ialah Singapura, Dinding, Melaka, Pulau Pinang dan Seberang Perai.

Bagaimanapun, Britain mempunyai kekuatan besar dan Raja-raja Melayu tidak mampu menentang mereka. Dasar seperti membawa masuk pendatang secara besar-besaran untuk kepentingan ekonomi Britain tidak diberi perhatian. Orang Melayu sudah menjadi warga jajahan walaupun raja-rajanya masih berdaulat.

Apabila Jepun datang, maka ternyata Britain bukanlah suatu kuasa besar yang kebal. Orang Melayu dapat memerhatikan bahawa Britain gagal mempertahankan Tanah Melayu, apatah lagi melindungi orang Melayu daripada dijajah Jepun.

Pada zaman Jepun, buat pertama kali, keseluruhan Tanah Melayu dijajah. Ketika mana Kedah, Perlis, Kelantan dan Terengganu diserahkan kepada Siam, pentadbiran negeri-negeri lain digabungkan dengan Sumatera.

Walaupun tidak berkuasa, Jepun tetap membenarkan kedaulatan raja-raja Melayu. Tetapi rakyatnya, iaitu orang Melayu menjadi warga jajahan Jepun.

Jadi apabila Britain kembali, mereka memaksa raja-raja Melayu menyerahkan kedaulatan bagi membolehkan penubuhan Malayan Union, dalam bentuk tanah jajahan Britain di mana semua penduduknya adalah warga jajahan.

Pendek kata, dalam sekelip mata dengan penubuhan Malayan Union, bangsa Melayu dan negeri Melayu hilang begitu saja. Yang ada hanyalah bangsa Malaya, yang menjadi warga jajahan Britain.

Maka Datuk Onn bangkit dan mengingatkan orang Melayu mengenai kedudukan mereka yang hampir kehilangan tanah air. Menurutnya, Britain tidak mempunyai hak untuk menukar kedudukan negeri-negeri Melayu menjadi tanah jajahan tanpa kebenaran orang Melayu sendiri. Ini kerana sebelum pendudukan Jepun, negeri-negeri Melayu tidak pernah dijajah oleh

Britain.

Kedaulatan raja-raja Melayu tidak boleh dihapuskan oleh Britain kerana kedudukan mereka adalah atas hak orang Melayu. Raja-raja Melayu, apatah lagi secara paksa dan ugutan tidak boleh menyerahkan kedaulatannya kepada penjajah Britain tanpa kebenaran orang Melayu, yang merupakan rakyat kepada raja-raja Melayu.

Raja-raja Melayu dan orang Melayu adalah saling lengkap-melengkapi. Mereka dihubungkan dengan kontrak sosial, budaya, sejarah dan tradisional yang sudah wujud sejak konsep kerajaan Melayu diwujudkan, lama sebelum kedatangan Britain dan gagasan kolonialisme, imperialisme dan negara bangsa ciptaan Barat.

Maka cabaran Datuk Onn tidak diendahkan oleh Britain kerana mereka berasakan bahawa orang Melayu tidak mempunyai kekuatan dan tidak mampu berbuat apa-apa. Bangsa Melayu hanyalah satu konsep abstrak yang tidak mempunyai nilai menurut kaca mata Britain.

Jadi terdapat dua langkah yang perlu dilakukan oleh Datuk Onn, iaitu meyakinkan raja-raja Melayu supaya menegaskan kedaulatan mereka dengan menolak Malayan Union. Kedua, menubuhkan satu badan yang disokong penuh oleh orang Melayu dan boleh mewakili bangsa Melayu. Badan ini ialah UMNO.

Menggembleng

Dengan perpaduan raja-raja Melayu dan UMNO, Datuk Onn menggembleng usaha menentang Malayan Union, yang dilakukan melalui demonstrasi di seluruh Tanah Melayu. Raja-raja Melayu pula memboikot majlis penubuhan Malayan Union dan sekali gus menolak pengiktirafan terhadap gagasan penjajah itu.

Dalam keadaan tertekan dan hampir kehilangan tanah air ini, orang Melayu bertambah sedar betapa lemah kedudukan mereka. Kalau benar-benar Britain terus memaksa untuk menubuhkan Malayan Union, tidak ada apa yang boleh dilakukan oleh orang Melayu.

Adakah Askar Melayu Diraja yang ditubuhkan dengan bantuan Britain mampu mempertahankan kedaulatan Tanah Melayu daripada dijadikan Malayan Union? Orang Melayu tidak mempunyai sebarang kekuatan. Bukan saja dalam bentuk ketenteraan, apatah lagi dalam bidang politik dan ekonomi.

Maka semasa perjuangan menentang Malayan Union ini dapat disedari bahawa ketika mana politik dipegang oleh Britain, bidang ekonomi pula berada di tangan kaum pendatang. Kedatangan mereka ke sini digalakkan oleh penjajah dengan kesetiaan dan identiti kenegaraan mereka adalah terhadap China.

Maka tidak hairanlah cawangan-cawangan Parti Nasionalis Cina (Kuomintang) ditubuhkan di Tanah Melayu. Ia menunjukkan bahawa politik mereka adalah cerminan apa yang berlaku di China.

Apabila Parti Komunis Cina berpecah daripada Kuomintang, perkara yang sama juga berlaku di Tanah Melayu. Parti Komunis Malaya (PKM) menjadi parti politik pertama ditubuhkan di Tanah Melayu pada tahun 1930 di Kuala Pilah dengan dirasmikan oleh Ho Chi Minh, pemimpin komunis Vietnam.

Tidak hairanlah, apabila Jepun memasuki China, PKM mula bersedia untuk menentang tentera Tokyo itu daripada menduduki Tanah Melayu. Mereka menyusun Tentera Pembebasan Rakyat Anti-Jepun Malaya (MPAJA) yang mendapat sokongan, bantuan dan pengiktirafan penjajah Britain.

Apabila Jepun menyerah kalah dan me-

Maka penjajah Britain mula melihat realiti di Tanah Melayu. Bayangkan jika PKM mendapat sokongan keseluruhan orang China dan Malaya menjadi komunis, pastinya kepentingan Britain dan Barat terjejas. Ketika mana Indonesia semakin dipengaruhi komunis, maka London sedar bahawa hanya orang Melayu yang mampu menjadi benteng menentang komunisme

ngundurkan diri, MPAJA yang dikenali sebagai Bintang Tiga menguasai sebahagian dari Tanah Melayu. Banyak orang Melayu yang dituduh sebagai tali barut Jepun menjadi mangsa membalas dendam secara rambang. Inilah bermulanya ketegangan hubungan kaum di Tanah Melayu kerana majoriti anggota MPAJA adalah keturunan Cina.

Bintang Tiga adalah lambang tiga bintang di tepi anggota MPAJA. Ia melambangkan tiga kaum di Tanah Melayu iaitu Melayu, Cina dan India. Mesejnya ialah tidak ada kedaulatan bangsa Melayu di Tanah Melayu.

Cita-cita PKM adalah jelas iaitu untuk menjadikan Tanah Melayu sebagai sebuah negara komunis dan di mana ketika itu, arahan langsung datangnya dari Moscow sebagai ketua komunis dunia, dan bagi Asia, kekuasaan terletak di Beijing.

Dalam empayar komunis, Malaya hanyalah salah satu tanah jajahan yang ditadbir dari Moscow melalui Beijing.

Sekembalinya Britain ke Tanah Melayu selepas pengunduran Jepun, mereka menghargai dan menganugerah bintang kepada pejuang-pejuang MPAJA dan PKM. Maklumlah pada masa itu, Moscow, Washington, Beijing dan London adalah sekutu.

Apabila perbalahan berlaku antara Moscow dan Washington, maka semua parti-parti komunis di dunia diarahkan menentang penjajah yang menjadi sekutu Amerika Syarikat (AS), termasuklah Britain. Atas arahan ini, PKM mengangkat senjata untuk menentang penjajah Britain atas nama perjuangan menuntut kemerdekaan Malaya. Bermulalah darurat yang mengubah perjalanan sejarah negara.

Maka penjajah Britain mula melihat realiti di Tanah Melayu. Bayangkan jika PKM mendapat sokongan keseluruhan orang Cina dan Malaya menjadi komunis, pastinya kepentingan Britain dan Barat terjejas. Ketika mana Indonesia semakin dipengaruhi komunis, maka London sedar bahawa hanya orang Melayu yang mampu menjadi benteng menentang komunisme.

Akhirnya Malayan Union dibubarkan dan Persekutuan Tanah Melayu ditubuhkan dengan kedaulatan raja-raja Melayu dipertahankan.

Setelah mengharungi detik-detik cemas ini, orang Melayu sedar bahawa mereka mesti berubah dan mendapatkan kekuatan sendiri, tidak boleh bergantung pada pihak lain. Untuk hidup, orang Melayu mesti merdeka dan mempunyai kekuatan dalam politik dan ekonomi.

UMNO di bawah pimpinan Tunku Abdul Rahman telah berjaya membawa Tanah Melayu mencapai kemerdekaan 50 tahun lalu. Maknanya orang Melayu dapat mempertahankan negeri-negeri mereka dalam bentuk negara bangsa moden dengan turut memberi kerakyatan saksama kepada penduduk daripada keturunan pendatang.

Sistem berkongsi kuasa dalam bentuk Perikatan membawa kestabilan. Apabila berhadapan dengan Singapura yang nyaris-nyaris menjadi komunis, maka Tunku membawa gagasan Malaysia yang turut disokong kuat oleh UMNO.



DATUK ONN JAAFAR

Malaysia meneruskan gagasan Persekutuan Tanah Melayu dengan membawa konsep bumiputera bagi mempertahankan hak dan memperbaiki kedudukan politik serta ekonomi orang Melayu dan peribumi di Sarawak dan Sabah, di samping mengelak Singapura daripada jatuh ke tangan komunisme.

Singapura kemudian dikeluarkan bagi menghalang usaha parti pemerintah negara itu yang cuba mengubah gagasan Malaysia. Konsep Malaysian Malaysia yang diperjuangkan mereka itu akan menjejaskan usaha menguatkan kedudukan politik dan ekonomi bumiputera.

Namun begitu, usaha memperbaiki kedudukan orang Melayu masih jauh dan sukar. Menjelang pilihan raya umum 1969, orang Melayu berasa jauh tertinggal dan bertambah lemah.

Maka selepas pilihan raya itu, diikuti dengan rusuhan 13 Mei, Allahyarham Tun Razak memperkenalkan dua gagasan penting bagi menguatkan kedudukan politik dan ekonomi orang Melayu di samping memperluaskan perkongsian kuasa pelbagai kaum di negara ini.

Langkah penggubalan Dasar Ekonomi Baru (DEB) dan penubuhan Barisan Nasional (BN) merupakan sumbangan besar UMNO untuk mewujudkan negara Malaysia yang adil dan maju.

Walaupun DEB sudah berakhir tetapi semangatnya wajar diteruskan kerana ia merupakan sebahagian daripada agenda Melayu untuk melahirkan bangsa yang cemerlang dan hidup di tanah air sendiri.

Gerakan menentang Malayan Union, penubuhan Persekutuan Tanah Melayu, perjuangan mencapai kemerdekaan, penubuhan Malaysia dengan konsep bumiputera dan Dasar Ekonomi Baru adalah sebahagian daripada agenda Melayu yang menjadi perjuangan UMNO.

Walaupun kini, kerajaan pimpinan UMNO sedang komited untuk menjayakan Misi Nasional, tetapi ia tidak terlepas daripada idealisme asal parti iaitu Perjuangkan Hidup Melayu, dalam erti kata bangsa berada pada kedudukan yang kuat, bukan saja dalam politik tetapi juga ekonomi.

Um - 11/5/2007